



Rabbiin subhaanahu wa ta'aalaa kan namoota qananiisu fi isaaniif rizqii kennu waan ta'eef, dirqamni namoota irra jiru Isaaf ajajamu fi galata galchuudha. Wantoota armaan olitti ibsuuf yaalle mee gaafi fi deebii A fi B jidduutti adeemsifamuun haa ibsinuu:

**A:** Maaliif Rabbiif ajajamtaa?

**B:** Akkuma beekkamu kan rizqii namaaf uumu, karaa ittiin argatan namaaf laaffisuu fi kennu Rabbi olta'aadha. Rizqiin Isaa addaan cinnaan jireenyi kiyya guutuun addaan citti. Fkn, osoo rooba samii irraa roobu baate, Isaan ala eenyullee duumessa irraa bishaan buuse nama sooru hin danda'u. Kanaafu, karaan Jaalala Isaa itti argatan, rizqii kana caalu itti argatanii fi adabbii Isaa jalaa itti bahan, Ar-Raaziqaaf ajajamuudha. Nama rizqii Isaa waakkatu fi Isaaf ajajamu dide, adabbii adda addaa akka adabuu addunyaa tana keessatti argine jirra. Adabbiin Aakhirah immoo kana caala. Kanaafu, karaan adabbii kana jalaa nagaha itti bahanii fi rizqii guddaa addunyaa tana caalu itti argatan, Rabbi olta'aaf ajajamuudha. Qanani Isaa waakkachuu fi Isa faallessuun maaliif boodarra rakkoo fi adabbiif of saaxilaa? Rabbiin subhaanahu wa ta'aalaa nama Isaaf ajajame, galata galchee fi amane akka hin adabne waadaa galee jira. Ni jedha:

مَا يَفْعَلُ اللَّهُ بِعَذَابِكُمْ إِنْ شَكَرْتُمْ وَءَامَنْتُمْ وَكَانَ اللَّهُ شَاكِرًا عَلِيمًا

١٤٧

**“Yoo isin [Isa] galateefattanii fi amantan, Rabbiin isin adabuu irraa maal godhaa? Rabbiin Galateefataa Beekaa ta'eera.”** (Suuratu An-Nisaa 4:147)

**A:** Qur'aana irraa aayah Rabbiin akka galateefatan itti ajajju naaf himu fi ibsuu dandeessaa?

**B:** Ayaanni shukrii (galateefachuutti) ajajan baay'eedha. Garuu aayah takka qofa siif haa dhiyeessu:

يَا أَيُّهَا الَّذِينَ ءَامَنُوا كُلُوا مِن طَيِّبَاتِ مَا رَزَقْنَاكُمْ وَاشْكُرُوا لِلَّهِ إِنْ كُنْتُمْ إِيَّاهُ تَعْبُدُونَ

١٧٢

**“Yaa warra amantan! Wantoota gaggaarii isiniif kennine irraa nyaadhaa. Isa kan gabbartan yoo taatan Rabbiif galata galchaa.”** Suuratu Al-Baqarah 2:172

Yaa warra Rabbi fi Ergamaa Isaa dhugoomsitan, haqaan gabbaramaan Rabbiin akka ta'e mirkaneessitanii fi Isaaf ajajamtan, wantoota gaggaarii fi halaala ta'an irraa nyaadhaa. [1] **“Isa kan gabbartan yoo taatan Rabbiif galata galchaa.”** Rabbiin galateefachuu jechuun qalbiin of gadi qabuu fi qananiin Isa irraa akka dhufe amanuu, arrabaan Isa faarsu, qaaman wanta Inni itti ajaje hojjachuu fi qanani Isaa badii ittiin hojjachuuf itti fayyadamuu dhiisudha. Aayah tana keessatti namni Rabbiin hin galateefanne, Isa qofa kan hin gabbarre ta'uu agarsiisa. Namni Isa galateefate immoo Isa gabbaree fi wanta itti ajaje hojjatee jira. Ammas, wantoota gaggaarii halaala ta'an nyaachun hojii gaarii hojjachuu fi

hojiin kuni fudhatama akka argatuuf sababa ta'a. Aaya tana keessatti qanani booda galata galchuutti (shukriitti) ajajuun, shukriin qananiin jiru akka eeggamuu fi qananiin bade akka dhufuuf sababa ta'uu agarsiisa. Galata galchuu dhiisu fi waakkachuun immoo qanani namarraa oofa.[2]

**A:** Rabbiin subhaanahu wa ta'aalaa akkamitti galateefachuu fi jaallachuu dandeessaa?

**B:** Rahmaani Raaziqa ta'e, qananiin ani qabu hundi Isarraa kan ta'e galateefachuu fi jaallachuu tooftaalee sadii fayyadama. 1ffaa-Qanani na bira jiru yaadachu fi itti xinxalluu. 2ffaa-Haala darbe kiyya yaadachuu, 3ffaa-namoota qanani ani qabu dhaban ilaalu. Qananiin akka beekumsaa, iimaana, qabeenya fi kan biroo na bira jiran qanani guddaa Rabbiin subhaanahu wa ta'aalaa na badhaasedha. Kanaafu, kuni galata galchuu fi Isa jaallachuutti na kakaasa. Isaaf ajajamu fi Isa faarsun galata galchuun qananiwwan kunniin akka itti fufanii fi dabalana waan taasisuuf. Qur'aana keessatti ni jedha:

يَا أَيُّهَا النَّاسُ اذْكُرُوا نِعْمَتَ اللَّهِ عَلَيْكُمْ هَلْ مِنْ خَلْقٍ غَيْرِ اللَّهِ يَرْزُقُكُمْ  
مِّنَ السَّمَاءِ وَالْأَرْضِ لَا إِلَهَ إِلَّا هُوَ فَإِنَّ تَوَفَّكُونَ

“Yaa namoota! Qanani Rabbi isin irra jiru yaadadhaa. Sila Rabbiin ala Uumaan (Khaaliqni) biraa kan samii fi dachii irraa rizqii isiniif kennu ni jiraa? Isa malee gabbaramaan haqaa hin jiru. Kanaafu akkamitti [Isa irraa] garagaltu?” Suura faaxir(35):3

Yaa namoota qanani Rabbiin isin irratti oole ammaa amma yaadadhaa. Yaadachuun kuni kan ta'u, arrabaan dubbachuu fi qanani Rabbi nu keessa jiruu fi naannawa keenya jiru itti xinxalluudha. Yaadannoon kunis Isa faarsu fi galata Isaaf galchuutti nu kakaasa. Ergasii hundeeffan qanani ni beeksise. Isaanis: Uumuu fi rizqiidha. “Sila Rabbiin ala Uumaan (Khaaliqni) biraa kan samii fi dachii irraa rizqii isiniif kennu ni jiraa?” Sila Rabbiin ala Khaaliqni samii irraa bishaan roobsu fi aduu ibsuun lafa keessaa biqiltoota isiniif biqilchee isin sooru ni jiraa? Akkuma beekamu Khaaliqni samii fi dachii irraa nama sooru Rabbiin qofa erga ta'ee, Isa malee gabbaramaan haqaa hin jiru.[3]

Samiwwanii fi dachii kan uumee fi waan hundaa irratti danda'a ta'ee malee gabbaramaan gabbarriin (ibaadan) isaaf malu hin jiru. Kanaafu, yaa namoota Rabbiin malee eenyullee hin gabbarinaa. Sababni isaas, Isaan ala kan isin fayyadu fi miidhu hin jiru. Ibaadaa Isaaf qulqulleessaa.[4] “Kanaafu akkamitti [Isa irraa] garagaltu?” Khaaliqa isin uumee fi rizqii isiniif kennu dhiistanii akkamitti makhluuqa (uumama) isin uumuu fi rizqii isiniif kennu hin dandeenye gabbartuu (waaqefattuu)? Kuni dhimma warri sammuu qaban ajaa'ibsifataniidha. Namni yaada fi fedhii qabuu wanta ibaadan (gabbarriin) isaaf hin mallee akkamitti gabbaraa (waaqefataa)?

**2-Tawakkula qabaachu**-Tawakkula jechuun wanta namarraa eeggamu hojjachuu waliin qalbiidhaan hirkannaa dhugaa Rabbiin irratti hirkachuu fi wanta Inni namaaf filatuuf harka kennuudha.[5] Tawakkulli (hirkannaa) hojii qalbiiti. Namni kan rizqii namaaf uumuu fi kennu Rabbi olta'aa ta'uu yoo mirkaneefate, Isarratti hirkata. Sababa isarraa eeggamu hojjachuu waliin qalbiin isaa Rabbitti rarraati. Sababni isaas, rizqii fi wanta rizqiif sababa ta'uu hunda kan uume Isa. Kuni naanna'e naanna'e, qalbi keessatti tasgabii fi gammachuu argamsiisa. Rizqiif jedhanii dhiphachuu fi sodaachu namarraa oofa.

Walaleessaan ni jedha:

وَكَيْفَ أَخَافُ الْفَقْرَ وَاللَّهُ رَازِقِي  
وَرَأَزِقُ هَذَا الْخَلْقَ فِي الْعُسْرِ وَالْيُسْرِ  
تَكْفُلَ بِالْأَرْزَاقِ لِلْخَلْقِ كُلِّهِمْ  
وَلِلذَّبِ فِي الْبَيْدَاءِ وَالْحَوْتِ فِي الْبَحْرِ<sup>(1)</sup>

Rabbiin Raaziqa kiyya ta'ee osoo jiru akkamitti hiyyummaa sodaadhaa?  
Rakkinnaa fi laafinna keessatti uumamtoota kanniin Kan razzaqu Isaa  
Uumamtoota hundaa razzaquuf itti-gaafatamummaa fudhatee  
Lootu gammoojji keessatti, qurxummii galaana keessatti

Ammas wanta armaan olitti ibsuuf yaalle gaafi fi deebiin ifa haa goonu.

**A:** Rabbiin irratti hirkachuu yommuu jettu maal jechuu keeti? Rizqii barbaadachuuf osoo hin carraaqin taa'anii, "Ani Rabbiin rizqii naaf kenna" jechuu keetii?

**B:** Lakki, akkasi miti. Akkuma duratti jenne Rabbiin irratti hirkachuu jechuun harkaan wanta namarraa eeggamu hojjachaa qalbiin immoo Isatti rarra'uu fi amanuudha. Mu'minni (namni dhugaan amane) rizqii irratti kan hirkatu osoo hin ta'in Rabbiin irratti hirkata. Kan dhugaan nama fayyaduu fi balaa namarraa deebisu qabeenya harkaa qabu osoo hin ta'in Rabbiin akka ta'e ni beeka. Kanaafu, qalbiin isaa qabeenyarratti osoo hin ta'in Gooftaa isaatti rarraati. Murtii Gooftaa isaatiif harka kenna. Kuni hundi tasgabii isaaf kenna. Ammas, harka marate taa'uun "rizqiin naaf dhufti" kan jedhu osoo hin ta'in, rizqii argachuuf hanga danda'e ni carraaqa. Sinbireen ganama rizqii barbaadachuuf baate galgala quufte galti. Wanti ishiin hojjattu sababa. Yommuu ishiin carraaqxu, Rabbiin rizqii ni kennaaf. Namnis haaluma kanaan yoo carraaqe, Rabbiin subhaanahu wa ta'aalaa rizqii ni kennaaf.

**A:** Namoonni gariin garmalee ni carraaqu, garuu rizqii xiqqoo argatu. Gariin immoo xiqqoma carraaqanii rizqii baay'ee argatu. Kuni akkamii?

**B:** Akkuma kutaa darbe keessatti jenne carraaqqin namootaa sababa rizqiiti malee maddaa miti. Kan rizqii maddisiisu, kennuu fi qoodu Rabbiidha. Sababni isaas, Rabbiin Ar-Razzaaq waan ta'eef rizqii kan uumu, sababa laaffisu fi nama fedheef kennuudha. Rabbiin subhaanahu wa ta'aalaa fedhii fi ogummaa Isaatiin rizqii namootaa garagara godhe. Ni jedha:

إِنَّ رَبَّكَ يَبْسُطُ الرِّزْقَ لِمَن يَشَاءُ وَيَقْدِرُ إِنَّهُ كَانَ بِعِبَادِهِ خَبِيرًا  
بَصِيرًا

“Gooftaan kee nama fedheef rizqii ni bal'isa, [nama fedhe immoo] itti dhiphisa. Dhugumatti, Inni gabroota Isaa ilaalchisee keessa beekaa, argaa ta'eera.” Suuratu Al-Israa 17:30

Yaa nama addunya tana keessatti iddoo qormaataa kaa'ame! Gooftaan kee namoota gariif rizqii bal'isuu fi namoota gariitti immoo rizqii dhiphisuun wanta namoonni ittiin qoraman taasise. Gabroota Isaa ilaalchisee haala isaanii sirritti beeka. Eenyutu durummaan akka isaaf malu, eenyutu hiyyummaan akka

---

isaaf malu sirritti beeka. Haala fi dhimma isaanii hunda sirritti arga. Kanaafu, hunda isaanitif ogummaa fi beekumsa Isaatiin rizqii ni qooda. Gabroota keessaa osoo rizqii itti bal'isee amanti fi Aakhiraan isaa kan jalaa badu jira. Ammas, gabroota keessaa nama osoo rizqii itti dhiphisee amanti fi Aakhiraan isaa jala baduu jira. Rabbiin rahmataa fi ogummaa Isaatiin mu'iminaaf wanta irra gaarii ta'e filata. Kanaafu, namni carraaqee rizqii xiqqoo yoo argate, suni wanta Rabbiin isaaf murteesse akka ta'e beekun obsuu qaba. *Kaayyoon guddaan rizqii bal'isuu fi dhiphisuu keessa jiru namoota qoruun nama galata galchu fi hin galchine, nama obsuu fi hin obsinee ifa baasuf waan ta'eef. Ergasii Guyyaa Murtii Jazaa isaaniif kafaluufi.*

---

**Kitaabban wabii:**

[1] Tafsiiru Xabarii-3/52

[2] Tafsiiru Sa'dii-78

[3] Ma'aariju Tafakkuri wa daqaa'iqu tadabburi-7/37

[4] Tafsiiru Xabarii-19/329

[Walillahi asmaa'ul Husnaa fad'uuhu bihaa](#)– lakk.61,62; AbdulAziz bin Naasir Jaliil

[5] Ma'aariju Tafakkuri wa daqaa'iqu tadabburi-6/576

**Date Created**

October 16, 2019

**Author**

admin